

Na osnovu člana 13. Zakona o principima lokalne samouprave Federacije Bosne i Hercegovine ("Službene novine F BiH" broj 49/06), i člana 9. Statuta Općine Stari Grad Sarajevo – Prečišćeni tekst ("Službene novine Kantona Sarajevo", broj 20/13), Općinsko Vijeće Stari Grad Sarajevo na sjednici održanoj dana 27.02.2014.godine, d o n i j e l o j e

O D L U K U

O ZASTAVI I GRBU OPĆINE STARI GRAD SARAJEVO

I – OPĆE ODREDBE

Član 1.

Ovom Odlukom se reguliše izgled zastave i grba Općine Stari Grad Sarajevo (u daljem tekstu: Općina) kao i način i uvjeti isticanja grba i zastave.

Član 2.

Zastavom i grbom se predstavlja Općina Stari Grad Sarajevo i ističe se kao simbol Općine.

II – IZGLED ZASTAVE I GRBA OPĆINE STARI GRAD

Član 3.

Zastava je bijele podloge u omjeru 1:2 i 2:3, sa grbom Općine na sredini zastave iznad kojeg velikim latiničnim slovima piše „Općina Stari Grad Sarajevo“.

Član 4.

Grb je u obliku štita zelene boje, u čijem gornjem desnom uglu stoji bijeli ljiljan, u donjoj polovici grba se nalazi sivo-bijela kupola, rubovi grba su crne boje.

Član 5.

Izgled i grafičko rješenje zastave i grba su dati u Aneksu , koji predstavlja sastavni dio ove odluke.

III – SIMBOLIČKO ZNAČENJE ZASTAVE I GRBA OPĆINE STARI GRAD

Član 6.

- (1) Zelena boja na grbu Općine predstavlja ruralni dio Općine i bogatsvo općine prirodnim ljepotama.
- (2) Kupola prestavlja urbani dio Općine, također kupola predstavlja jedinstvo svih naroda koji žive u Općini.
- (3) Bijeli ljiljan predstavlja spomen na srednjovjekovnu Bosnu i na srednjovjekovni grad Hodidjed koji se nalazio na lokalitetu Općine Stari Grad Sarajevo.

Član 7.

Bijela boja podloge zastave Općine je simbol za mir.

IV- UPOTREBA I ISTICANJE ZASTAVE I GRBA

Član 8.

Korespondencija koju obavljaju Općinski načelnik i druge osobe ovlaštene da istupaju u ime Općine vrši se na memorandumu sa otisnutim grbom općine.

Član 9.

(1) Zastava Općine ističe se na zgradama Općine, u dane državnih praznika i na jarbolima duž ulica grada u dane praznika Općine. Zastava se može isticati i prilikom obilježavanja godišnjica i drugih manifestacija značajnih za Općinu.

(2) Zastava Općine stalno je istaknuta i na službenoj zgradi u kojoj je sjedište Općinskog vijeća i organa uprave Općine, a može biti istaknuta i na zgradi u kojoj predstavnici Općine primaju službenu posjetu stranih državnika ili se u njoj održava neka druga svečana priredba od značaja za Općinu.

(3) Zastava Općine ističe se i na međugradskim i međuopćinskim manifestacijama prijateljstva i saradnje, kao i na javnim priredbama na kojima se manifestira Općina.

Član 10.

U svim prostorijama u zgradi Općine mora biti istaknut grb Općine na vidnom mjestu.

Član 11.

U svim poslovnim zgradama i poslovnim prostorima u vlasništvu općine a izdati su u zakup mora biti istaknut grb Općine na vidnom mjestu.

Član 12.

Zabranjeno je isticati poderanu i nečistu zastavu Općine.

Član 13.

(1) Zastave Općine se spuštaju na pola koplja u danima žalosti na prostoru Bosne i Hercegovine, Federacije Bosne i Hercegovine, Kantona Sarajevo, Grada Sarajevo i Općine Stari Grad Sarajevo.

(2) Odluku o spuštanju zastava na pola koplja donosi Općinski načelnik.

Član 14.

Zastava Općine zajedno sa zastavom države Bosne i Hercegovine se ističe na saobraćajnicama na onim ulazima u Općinu koji su ujedno ulazi i u Grad Sarajevo. Odgovoran za sprovedbu ovog člana jeste Općinski načelnik .

VII- KAZNENE ODREDBE

Član 15.

(1) Fizičke osobe koje prekrše član 11. ove odluke dužne su platiti kaznu u iznosu od 100,00KM.

(2) Odgovorne osobe u pravnim licima koja prekrše član 11. ove odluke dužne su platiti kaznu u iznosu od 150 KM.

Član 16.

Postupak za naknadu štete i za krivičnu odgovornost pokrenut će se i protiv svake osobe koja namjerno ošteti grb ili zastavu u vrijeme njihove službene upotrebe ili ih javno izloži poruzi na bilo koji način.

VIII- PRELAZNE I ZAVRŠNE ODREDBE

Član 17.

Kontrolu i nadzor nad provođenjem ove odluke vrši Općinski načelnik.

Član 18.

- (1) Služba za privredu je dužna obavijestiti o obavezama proisteklim iz ove odluke sva pravna i fizička lica na koja se odnosi član 11. u roku od 15 dana od stupanja na snagu ove odluke.
- (2) Sva pravna i fizička lica su dužna ispuniti obavezu iz člana 11. u roku od 7 dana od dana prijema obavijesti iz stave 1. ovog člana.
- (3) Ukoliko nakon ovog roka Služba za privredu utvrdi da fizičko ili pravno lice nije ispunilo svoju obavezu predložiti će pokretanje prekršajnog postupka kod nadležnog suda.

Član 19.

Odluka stupa na snagu danom objavljivanja u "Službenim novinama Kantona Sarajevo"



PREDSEDAVAJUĆI
OPĆINSKOG VIJEĆA STARI GRAD SARAJEVO

Vedran Dodik, dipl. pravnik

Broj: 02-69-128/14
Sarajevo: februar 2014. god.